

आकाशवाणी

खास-खास खबरां:-

- प्रधानमंत्री नरेन्द्र मोदी अज्ज दिल्ली दे राय पिथौरा सांस्कृतिक परिसर च भगवान बुद्ध हुं दे कन्नै सरबंधत पवित्र पिपरहवा अवशेशों दी अंतराष्ट्री नमैश दा उदघाटन करगंन।
- चुनां आयोग नै पच्छिम बंगाल च सरबंधत जिला चुनास अधिकारियें गी मतदाता सूचियें च फर्जी जां गैर-हाजर मतदाताएं दे नांस गैर कन्नूनी ढंगे नै शामिल करने दे आरोपी 5 मुअत्तल कीते गेदे राज्य अधिकारियें खलाफ FIR दर्ज करने दा निर्देश दिता ऐ।
- इलेक्ट्रानिक्स ते सूचना टेक्नालोजी मंत्रालय नै सोशल मीडिया मंच-एक्स गी नोटिस जारी कीता ते उसी गोक- AI पर अश्लील समग्री हटाने लेई आखेया ऐ।
- एन.सी.बी. नै भारती यात्रियें गी सऊदी अरब दी यात्रा शा पैहले दवाइयां लेई जाने लेई जरूरी इजाजत लैने दी सलास दिती ऐ।
- मौसम विभाग नै अज्ज दिल्ली- हरियाणा- पंजाब ते चंडीगढ़ च बड़ी भारी धुंध पौने दी चेतावनी आला रेड-अलर्ट जारी कीता ऐ।

<><><><><><>

PM-Piparhawa

प्रधानमंत्री नरेन्द्र मोदी अज्ज दिल्ली दे राय पिथौरा सांस्कृतिक परिसर च भगवान बुद्ध हुं दे कन्नै सरबंधत पवित्र पिपरहवा अवशेषों दी भव्य अंतराष्ट्री नमैश दा उदघाटन करडन। इक सोशल मीडिया पोस्ट च श्री मोदी होरें आखेआ जे एह नमैश भगवान बुद्ध हुं दे महान विचारें गी होर मता लोकप्रिय बनाने आस्तै उं दी सरकार दी वचनबद्धता दे मताबक ऐ। उनें आखेआ जे एह देश दे युवाएं ते समृद्ध संस्कृति बश्कार सरबंधें गी होर मजबूत करने दा बी इक प्रयास ऐ।

प्रधानमंत्री होरें गलाया जे पिपरहवा दे प्रामाणिक अवशेष ते पुरातात्विक सामग्री नमीं दिल्ली दे राष्ट्री संग्रहालय ते कोलकाता दे भारती संग्रहालय दे संग्रह च संरक्षित न। उनें इनें अवशेषें दी स्वदेश वापसी आस्तै कम्म करने आहले सब्बन लोकें दी सराहना बी कीती।

<><><><><><>

## Kolkata FIR

चुनांस आयोग नै पच्छिम बंगाल च सरबंधत जिला चुनांस अधिकारिये गी मतदाता सूची च फर्जी जां गैर हाज़र मतदाताएं दे नांस गैर-कनूनी ढंगे नै शामिल करने दे आरोपी 5 मुअत्तल कीते गेदे राज्य अधिकारिये दे खलाफ FIR दर्ज करने दा हुकम दिता ऐ। राज्य दे मुख निर्वाचन अधिकारी हुंदे दफ्तर दे सूत्रे मूजब बरुईपुर पूर्व विधानसभा खेतर दे मतदाता पंजीकरण अधिकारी देबोट्टम दत्ता चौधरी-सहायक मतदाता पंजीकरण अधिकारी तथागत मंडल- मोचना विधानसभा खेतर दे मतदाता पंजीकरण अधिकारी बिप्लब सरकार- सहायक मतदाता पंजीकरण अधिकारी सुदिप्ता दास ते डाटा एन्ट्री ऑपेटर सुरजीत हल्दर दे खलाफ अपराधिक मामले दर्ज करने दे निर्देश जारी कीते न। मतदाता सूचिये दी बशे नज़रसानी दे दरान इने अधिकारिये पर मतदाता सूची च फर्जी नांस जोड़ने दा आरोप हा। चुनांस आयोग नै पैहले गै इने सब्बने गी मुअत्तल करने ते इंदे खलाफ FIR दर्ज करने दा निर्देश दिता हा- पर एहदे बावजूद राज्य सरकार ने कोई FIR दर्ज कीती।

<><><><><><>

## ECI-OBC Certificates

चुनांस आयोग ने निर्देश जारी कीता ऐ जे पच्छिम बंगाल सरकार आसेआ 2010 दे बाद जारी होरने पच्छड़े तबके सरबन्धी प्रमाण-पत्रे यानि ओ.बी.सी. सर्टिफिकेटे गी मतदाता सूचिएं दी बशे नजरसानी आहली प्रक्रिया कन्ने जुड़ी दी मसौदा मतदाता सूची च दावे ते ऐतराजे दे नबेडे दरान पन्छान आहला वैध दस्तावेज नेई मन्नेआ जाहग। एह गैह पिच्छले बरे 24 दिसंबर गी कलकत्ता हाईकोर्ट दे ओकडे हुकम दे बाद पुट्टी गेई ऐ जेहदे च 2010 थमां 2024 दे दरम्यान जारी 113 समुदाये दे ओ.बी.सी. प्रमाण-पत्र, कनूनी वैधता पूरी नेई होने करी रद्द करी दिते गे हे। चुनांस आयोग ने साफ कीता ऐ जे होरने पच्छड़े तबके कन्ने ताल्लुक रक्खने आहले लोक योग्य मतदाता न, पर 2010 दे बाद दे उंदे प्रमाण-पत्रे गी चुनाएं सरबन्धी मामले च पन्छान जां समुदाय वर्ग दे प्रमाण दे रूप च इस्तेमाल नेई कीता जाई सकदा ऐ।

<><><><><><>

## MEITY GROK AI

Electronics ते सूचना टैक्नालोजी मंत्रालय नै सोशल मीडिया मंच “एक्स” गी नोटिस जारी कीता ऐ ते उसी Grok AI पर अश्लील समग्री हटाने लेई आखेया ऐ। सूत्रे मूजब सरकार नै अश्लील समग्री बनाने ते सांझी करने लेई गोक AI दे माड़े इस्तेमाल पर चैंता बुज्झी ऐ। इस सरबंध्ये च लिक्खी गेदी चिट्ठी च मंत्रालय नै आखेया ऐ जे एक्स पर यूजर यानि उपभोगकर्ता- Grok AI सेवा दा माड़ा इस्तेमाल करिये फर्जी खाते बना करदे न ते महिलार्ये दियां अश्लील तस्वीरां जां वीडियो गलत मंशा कन्नै सांझी करा करदे न। मंत्रालय नै आखेया ऐ जे एह प्लेटफार्म- सूचना टैक्नालोजी कन्नू -2000 ते आई.टी नियम 2021 दे तैहत नियामक प्रावधाने दी पालमा नैई करा करदा ऐ। मंत्रालय नै चेतावनी दिती ऐ जे नियमें दी पालमा नैई करने गी बड़ी गंभीरता कन्नै लैता जाहग ते इस सूत्रे च सोशल मीडिया मंच दे खलाफ सख्त कन्नूनी कारवाई कीती जाहग।

<><><><><><>

## NCB-Saudi Arabia

नार्कोटिक्स कंट्रोल ब्यूरो -एन.सी.बी. नै भारतीय यात्रिये गी सऊदी अरब दी यात्रा थमां पैहले दवाइयां लेई जाने लेई लोडचदी इजाज़त लैने दी सलाह दिती ऐ। सऊदी अरब आसेया देसै च दाखल होने जां देशे थमां जाने आले लोके लेई व्यक्तिगत इस्तेमाल लेई दवाइयां लेई जाने लेई पैहले गै इजाज़त लैने दे सरबंध्ये च इक इलेक्ट्रॉनिक सेवा मंच शुरु करने दे बाद एह सलाह जारी कीती गई ऐ। एन.सी.बी. नै आखेया ऐ जे किश दवाइयां भारत जां होरने देशे च उपलब्ध न- ओह सऊदी अरब च प्रतिबंधित होई सकदियां न। एन.सी.बी. नै यात्रिये गी सऊदी अरब च बंदश आली दवाइये दी अधिकारिक सूची दिक्खने दी बी सलाह दिती ऐ।

<><><><><><>

## Poonch Property Handler

जम्मू-कश्मीर पुलसे कल पुंछ जिले दी मंडी तहसील च पाकिस्तान च रेहिये गतिविधियां चला रहे आतंकवादिये दे इक सरगनाह दी अचल सम्पत्ति जब्त कीती ऐ। अदालत दे निर्देशे दी पालमा करदे होई 6 कनाल ते साइडे 13 मरले च बनी दी इस सम्पत्ति दी कीमत अंदाजन कोई 13 लक्ख 36 जहार दस्सी जा रही ऐ।

एह सम्पत्ति पुंछ दे चम्बर कनारी ग्रां दे बसनीक सुलतान लोन दे पुतर जमाल लोन उर्फ जमाला दी ऐ- जेहड़ा बन्ने पार उंठी गेदा ऐ ते उत्थुआं ऐसी गतिविधियां चला करदा ऐ जेहड़ियां राष्ट्रीय सुरक्षा लेई खतरा न। ओहदे उपरोतली कनूनी प्रक्रिया कोला बचदे रोहने कारण अदालतें उसी फरार अपराधी घोषत करी दिते दा ऐ।

<><><><><><>

Trump-Iran

अमरीका दे राष्ट्रपति डॉनल्ड ट्रम्प होंरें ईरान गी धमकी दिती ऐ कि जेगर ईरानी सुरक्षाबलें प्रदर्शनकारियें पर गोलीबारी कीती तां ओह प्रदर्शनकारियें दे समर्थन च आई जाडन। इक सोशल मीडिया पोस्ट च ट्रम्प होंरें आखेआ ऐ जे ईरान च जारी अशांति च केई लोक मारे गे न। ट्रम्प हुं' दी टिप्पणी दा जोआब दिंदे होई ईरान दे इक वरिष्ठ अधिकारी अली लारीजानी ने चेतावनी दिती ऐ कि जेगर अमरीका ने ईरान दे घरेलू मामलें च दखल दिता तां इसी समूलचे खेतर च अस्थिरता आहने जनेहा मन्नेआ जाहग।

<><><><><><>

Taiwan Prez.

ताइवान दे राष्ट्रपति लाइ चिंग-ते होंरें आखेआ ऐ जे चीन दे बधदे विस्तार गी दिक्खदे होई ओह अपनी संप्रभुता दी राक्खी करने ते अपनी रक्षा क्षमता गी मजबूत बनाने लेई दृढ़ संकल्प न। फौजी अभ्यास दे दरान चीन आसेआ ताइवान आहली बक्खी रॉकेट दागने दे बाद श्री चिंग हुं'दा एह बयान आया ऐ। राष्ट्रपति होंरें आखेआ जे अंतरराष्ट्री समुदास ताइवान दे लोकें आसेआ अपनी आत्मरक्षा दे मजबूत धेइये गी दिक्खना चांहदे न। उंनें आखेआ जे राष्ट्रपति दे तौरा पर उं'दा रों' म्हेशां साफ रेहा ऐ जे ओह राष्ट्री संप्रभुता दी पूरी तगड़ेयाई कन्नै हिफाजत करडन ते राष्ट्री रक्षा गी मजबूत बनाडन।

<><><><><><>

Cricket U-19

मर्दे दी अंडर-19 क्रिकेट च टीम इंडिया अज्ज दपैहरी 1.30 बजे बेनोनी दे विलोमूर पार्क च त्रंऊ मैचें दी श्रृंखला दे पैहले इक रोजा मैच च दक्खन-अफ्रीका कन्नै खेडुंग।

15 जनवरी थमां शुरु होआ रदे आई.सी.सी. अंडर-19 विशअव कप शा ठीक पैहले एह श्रृंखला दौनें टीमें लेई आदर्श त्त्यारी दा कम्म करोग। वैभव सूर्यवंशी इस श्रृंखला च भारत दी कप्तानी करगंन कीजे आयुष म्हात्रै कलाई दी सट्ट करी इस श्रृंखला च शामिल नैई होगंन। मोहम्मद बुलबुलिया दक्खन-अफ्रीका दी अगुआई करगंन। दक्खन अफ्रीका कोल बी इक मजबूत टीम ऐ ते ओह इस श्रृंखला दा इस्तेमाल बड्डे टूर्नामेंट शा पैहले अपनी त्त्यारी गी होर निगगर करने दी कोशिश करोग।

<><><><><><>

IMD Weather

भारतीय मौसम विभाग नै अज्ज दिल्ली- हरियाणा- पंजाब ते चंडीगढ़ च घने शा बडे घने कोहरे लेई रेड- अलर्ट जारी कीता ऐ। विभाग नै हिमाचल-प्रदेश दे बक्ख-बक्ख इलाकें च ठंडू दी स्थिति ते उत्तराखंड च जमीनी सतह पर पाला पौने दी पेशगोई कीती ऐ। मौसम विभाग नै आखेया ऐ जे पूर्वी उत्तर-प्रदेश- हिमाचल -प्रदेश ते बिहार दे बक्ख-बक्ख इलाकें च सोमवारें तगर ठंड दी स्थिति बनी दी रौहग।

<><><><><><>